

EFESOFỌ Paulo Ovoli Kĩ Etsɛlɛ Ẹma Efesofọ

^I Yĩ Paulo kĩ ñyadani Kristo Yesu foto ɔnyanɛ nɛ Baguma kawɛ onukpě, lɛtsɛlɛ ovoli kĩĩ mamena mi Baguma bati nɛ Ẹfeso a kĩ miadi ɔnɔkɔali nɛ mi kadzi kame, mikena ɔmɔa mɔ Kristo Yesu a. ^{II} Baguma boe Ọlɛga, mɔ boe Ọlate Yesu Kristo bɛmɔ mi kɔnya bɛkpa mi lukudo lɛmɛ.

Baguma Hila Bati a Kĩ Bɛkɛna Ọmɔa Mɔ Kristo a.

^{III} Mifɔ bɔnyɛ Baguma boe Ọlate Yesu Kristo Ọlɛga a kɔlɛ, kitonɛkĩ nɛ ayekĩ bɔkɛna ɔmɔa mɔ Kristo sũ ni, ɛkpa boe hũhũ kame nhila adi nyɛ adi kĩ edeĩ nɛ ode katinya a kame a. ^{IV} Fɔmɔ Baguma labɔa katinya malo ni, ɛpau boe eyi kɔkɔɛ kĩ bɔanya ye bade fɔtsã ɔmɔa kakɛna mɔ Kristo akũ, ayekĩ bɔakɛna bati kpalewa kĩ nfumususu adima lɛlãa be akũ nɛ ye anɛ. ^V Ayekĩ Baguma awɛ boe kalɛ sũ ni, ehihiɛ kɔkɔɛ kĩ fɔatsã Kristo akũ yaakɛna boe ye babi. Ade fukĩĩ koũ nyɛ ye kakɔna mɔ kawɔlɛ a. ^{VI} Nɛ foesũ mifɔ bumu Baguma, nɛ kɔnya baũ a kĩ ɛmɔ boe faa etsãmɛna ye Obi kĩ yaátuno kalɛ a akũ! ^{VII-VIII} Kitonɛkĩ fɔtsã Kristo babɔanɛ kawula kame sũ ni, bɔna katɛ, ade foe nyɛ kĩ Baguma kɔa boe tɔkpa ete boe. Midã ayekĩ Baguma kɔnya a kĩ ɛmɔ boe, ɛkpa boe nyansã mɔ fɔtsa kayɔkanu a pɔnɛ! ^{IX} Baguma fɔ bunyi nhihie a kĩ ɛkɛna ɛkɔla eyi anɛ kɔkɔɛ, kĩ yaawũna etsãmɛna Kristo akũ

a. ^X Nhihie a nye kī nte loko a wo oto ni, Baguma aakpota letsa nye letsa a kī ebo a ne tite mo ode a ekpa edo ne Kristo kayo.

^{XI} Baguma fō bekena letsa nye letsa ne ye kawε mo nhihie onukpē. Ade epau boe kī bonya ye moawe bati ne omoa kakena mo Kristo kame, ne ye kawε mo kalekayi, ne kayokayi a onukpē.

^{XII} Ne foesū mifō boe a kī bonya loto boadā Kristo anε a, bumu Baguma kukūkpale a. ^{XIII} Ade mi malo, kī minu onokwali kale a kī kenye Kale Wī a, kī kema mi nkpā kate a, midani Baguma bati. Ayekī mite Kristo mido sū ni, Baguma kōa Hūhū Kpalewa a kī ele eyi a eyi mi osū kī minya ye bade. ^{XIV} Hūhū Kpalewa kīi nye kasipi kī bóate letsa a kī Baguma le eyi ekpa ye bati a. Kasipi kīi akpa boe anε kate kī Baguma aakpa bati a kī benye ye bade a akū akū kadzi. Mifō bumu ye kukūkpale a!

Mpaε Kī Paulo Bōa.

^{XV} Ne fukī sū, kito anε kī nnu kī mite boe Olate Yesu mido, miawe Baguma bati a flee kale a, ^{XVI} ntáfō Baguma kole kanye ne mi lolō. Mate anε ne mi akū ne yī mpaεbo kame, ^{XVII} ade mawā Baguma, boe Olate Yesu Kristo Olεga, kī enye kukūkpale flee a, kī ekpa mi Hūhū a kī yaakpa mi nyansā, enye Baguma etsa mi ayekī míanyi ye kanyi wī.

^{XVIII} Make Baguma aduli kī ebinya mi anε mipuli mimo ye ohaī a, ayekī míanyi letsa a kī de akū eve mi ekpa kī midā anε a. Ye awāwā nhila a kī ele eyi kī yaakpa ye bati a kī bekpale be akū a ate koya paa. ^{XIX} Midā ayekī ye kobē

kpale a akena adzuma ne boe a kī bote ye budo a kame. Kobē kī kī koakena adzuma ne boe kame a, ^{XX} ketimo kobē a kī Baguma koa edzela Kristo etomena kanokpa, ekoa ye edzina ne ye somona ne ode flee a. ^{XXI} Ade awā Kristo anya legā ne ode fogā flee, bati kī bideī otumi flee, bati kī bideī kobē flee mo balate flee akū a. Ye legā kadzakō bē legā nye legā kadzakō ne katinya kī mo kiki kaaya a kame. ^{XXII} Baguma koa letsa nye letsa edo ne Kristo aboa kayo ade ekoa ye ekpa asoli a nde ye lolō ne fotsa flee kame a. ^{XXIII} Asoli kī nye Kristo sukena, kī sefō asoli a kpola, ade Kristo moawe lemē afō letsa nye letsa akpola ne kako nye kako a.

II

Botsā Kristo Akū Bona Nkpā.

^I Kokoē a, ne mi ato osi mo tokpa sū ni, miku ne hūhū kame. ^{II} Ne loko na kame a, midzi nkpā ne katinya kame tisi akū. Mikoa akū mikpa kobē a kī koanya legā ne owe kame hūhū a akū a. Ade koe nye hūhū a kī finyaa yakena adzuma ne bati a kī baátse Baguma oledo a kame a. ^{III} Ne onokoli kame ni, boe flee bona nde be, budzi nkpā ne boe sukena fowetsa onukpē, bokakena fotsa a kī boe sukena mo adzuni awe a. Ne katinya kame obla kpa a kī edeī ne boe kame sū ni, Baguma na kalokpa ne boe akū nde ayekī ena ne batidziwa kasinu flee a akū a. ^{IV} Lemē kī Baguma deī konyakamo, mo odo baū ekpa boe sū ni, ^V titō kī boe tokpa fō buku ne hūhū kame malo a, efō bona nkpā ne Kristo kame. Baguma semekale odi sū mina nkpā kate. ^{VI} Ayekī bokena

om̄oa m̄o Yesu Kristo sũ ni, Baguma dzela boe m̄o ye etomena kanokpa k̄i bonya legã m̄o ye ne ode. ^{VII} Baguma kena fukĩ k̄i yanye ye semekale baũ a k̄i edeĩ ekpa boe ne lok̄o flee kame a, ne ayekĩ edeĩ od̄o ekpa boe ne Kristo sũ a. ^{VIII-IX} Baguma semekale odi, m̄o mi katekado akũ fotsã sũ mina kate. Nn̄é mi m̄oawe mbodi kaboa kame futo, mbom Baguma futetsa f̄oane k̄i odima lel̄aapulĩ ek̄oa foe epia. ^X Baguma leb̄oa boe m̄o ye m̄oawe awe, k̄i b̄okena om̄oa m̄o Kristo Yesu, budzi nkp̄a b̄okena adzuma wĩ a k̄i ye m̄oawe a ek̄oa eyi k̄i boyaakena a.

Bate Badone a Flee Kena Om̄oa M̄o Kristo.

^{XI} Mite ane k̄i kok̄oe a, nn̄é Yudaf̄o babi miane. Yudaf̄o a k̄i bitsua f̄okpati a avũna mi k̄i bati k̄i bet̄atsua f̄okpati. Leme lekpati katsua nye sukena katsua keke, k̄i otidziwa lek̄oa awe ekena foe. ^{XII} Mite ane k̄i ne lok̄o na kame a, mina m̄o lugo ne Kristo sek̄e. Minya ban̄ovoẽ k̄i bet̄ana ne bati a k̄i Baguma pau a kame. Mit̄ana ne apam a k̄i Baguma kena m̄o fotsa a k̄i ele eyi ekpa ye bati a kame. Midzi ne katinya kame k̄i mit̄ana ane kate ne letsama akũ, ade mit̄ana Baguma adima a. ^{XIII} Leme finyaakĩ fotsã Kristo Yesu wuda kame bekp̄a mi a k̄i mina m̄o lugo a mifuã miyakena om̄oa m̄o Kristo.

^{XIV} Kitonekĩ Kristo m̄oawe a lek̄oa lukudo ema boe, ekena bikĩ benye Yudaf̄o m̄o bikĩ benye Yudaf̄o a om̄oa. Ek̄oa ye m̄oawe sukena enye likesĩ nde seebi a ne be kayite. ^{XV} Ewola Yudaf̄o mbla m̄o ye akũ temanis a, ayekĩ yaakpota bati kutsu nviã a bek̄ena oti voẽ m̄oa m̄o ye, lok̄oa lukudo leya. ^{XVI} Kristo tsã ye wuda ne asendua

akū a kame εwola likesĩ a kĩ lideĩ ne be kame a. Eboomu fude nviã a, bekena omoa ade bedani beya ne Baguma sekẽ a. ^{XVII} Foesũ Kristo yade letsã ne Kale Wĩ a lukudo akū ekpa bati flee, bikĩ benyẽ Yudafɔ a kĩ bena mo lugo ne Baguma sekẽ a, mo Yudafɔ a kĩ bifuã Baguma a. ^{XVIII} Kristo akū fotsã mo boe a kĩ bonye Yudafɔ mo bikĩ benyẽ Yudafɔ a bóapuli bɔtsã Hũhũ a akū boya ne ɔlega a sekẽ.

^{XIX} Ne foesũ ni, mi a kĩ minyẽ Yudafɔ a mibuki minyẽ basitsãne ãye banovoẽ, mbom finyaa mimo Baguma bati a midani kade moa bati mo Baguma kola babi. ^{XX} Bike mi malo mite ne seebi seyode a kĩ foto banyane mo Baguma onukpẽ banyene a ke a akū, ade Kristo Yesu moawe nyẽ kola a akū de titiliwu a. ^{XXI} Ade ye pini kola akū fotsa a flee ekpota a, kafõ koabo ane kakena nde afolie kola kpalewa kakpa Baguma a. ^{XXII} Ne mi omoa kakena mo Kristo kame a, bekoa mi malo bibumo be nkae a bake kola a kĩ Baguma aadzi ne Hũhũ kame a.

III

Paulo Kena Adzuma Ne Bikĩ Benyẽ Yudafɔ a Kame.

^I Ne fukĩ sũ ni, yĩ, Paulo, kĩ bido ne kola ne Kristo Yesu mo mi a kĩ minyẽ Yudafɔ a sũ, maboa mpae kakpa Baguma. ^{II} Mate kado kĩ minu ayekĩ Baguma mó yĩ konya, ekpa yĩ adzuma kĩ kĩ nkena nkpa mi kale. ^{III} Nde ayekĩ ntsɛle foe lukũ mma mi ãyatẽ a, Baguma nye ye nhihie a kĩ ekena ekola a etsa yĩ. ^{IV} Nte miakã ovoli a ni, miapuli mimó ayekĩ nnu Kristo fotsa kolawa a kayo.

^V Ne kòkòe lòkò a, Baguma tánye nìhìe kòlawa kī ẹtsa batidziwa, lẹmẹ finyaa ni, Baguma nye foe ẹtsa ẹtsāmẹna Hūhū a akū ẹkpa ye fòtò banyanẹ kpalewa mọ Baguma onukpẹ banyenẹ a. ^{VI} Nìhìe kòlawa a nye kī fòtsā Kale Wī a akū bikī benyẹ Yudafo a lẹmẹ kẹna nde Yudafo aye. Bẹkẹna sukẹna mọape a bati, kī bẹna tsefā nẹ letsa a kī Baguma lẹ eyi ẹtsāmẹna Kristo Yesu akū a kamẹ.

^{VII} Baguma tsā ye kòbẹ akū ẹmọ yī kọnya ẹkọa yī ẹkẹna Kale Wī kī ọsumunẹ. ^{VIII} Tito kī ìnye obisẹde kòlaa nẹ Baguma bati a kamẹ malo ni, Baguma mọ yī kọnya kī nkọa fòtsa wī beblebee a kī fudei nẹ Kristo kamẹ, kī fòtẹ kọya baū lẹmẹ a nde letsā nkpa bikī benyẹ Yudafo a. ^{IX} Ade edo yī kī nfō bati flee binyi ayekī Baguma nìhìe kòlawa a aanẹ kanya ẹkẹna adzuma. Baguma kī ye nye fòtsa flee ọboanẹ a, kọa fòtsa ẹkọla anẹ kòkòe, ^X ayekī nẹ finyaa lòkò kamẹ, baatsā asoli bati a akū benyẹ Baguma nyansā ahọlọ ahọlọ a betsa fọgā mọ otumifo a kī banya akū nẹ ode katinya kamẹ a. ^{XI} Fukīi nye Baguma nìhìe kī ẹlá kawūna a kī ẹkẹna eyi anẹ kòkòe, ade fòtsā boe Ọlate Yesu Kristo akū fọya nẹ foe kamẹ a. ^{XII} Ayekī bọkẹna ọmọa mọ Kristo, bọtẹ ye budo lẹmẹ sū ni, budei ọwọlẹ kado kī bóapuli bọnaa Baguma anẹ faa. ^{XIII} Nẹ foesū make mi aduli, mitafō akpọ liveli mi nẹ lubo a kī mamọ nẹ mi lolọ a sū, kitonẹkī foe flee fọanya mi nfasọ.

Ayekī Kristo Awe Boe Kale.

^{XIV} Nẹ fukīi sū ni, nke aduli mabọa mpae nẹ boe Ọlẹga a, ^{XV} kī ẹla katete kadi nye kadi nẹ tite mọ

ode anɛ. Ade ye ate ke dī lɛmɛ a. ^{XVI} Mabaɔ mpae kī Baguma etsā ye Hūhū akū edo mi ɔwɔle kame kɔbē a kī kudeī nɛ ye kukūkpale beblebee kame a. ^{XVII} Mabaɔ mpae kī mi katekado kefō Kristo ena nɛ mi kame. Mabaɔ mpae lɛmɛ kī midza pintii nɛ ɔɔ kame, ^{XVIII} ayekī mi mɔ Baguma bati a flee miana kɔbē minu Kristo ɔɔ a kadzele mɔ ye lugo, ye kade mɔ kadzū a kayɔ. ^{XIX} Baguma efō miyaanyi Kristo ɔɔ a, tito kī otidziwa lelāapuli enu foe kayɔ dzununuunu eyua malo, ayekī Baguma kutidu a aate mi kame flee.

^{XX} Baguma a kī yapuli kakena fukī boavia a flee mɔ fukī boakena a, nɛ kɔbē a kī kɔakena adzuma nɛ boe kame a, ^{XXI} ade ye kade nye kamu nɛ asoli bati a mɔ Kristo Yesu kame, fɔnaa kasinu flee kame, kito finyaakī kanaa daa daa! Fɔya lɔmɔ.

IV

Bɔnye Oti Mɔa Nɛ Kristo Kame.

^I Foesū yī a kī nwaa kɔla nɛ ayekī masum boe ɔlate sū a, makpa mi kɔde kī midzi nkpā a kī yaaketi mɔ ayekī Baguma ve mi kī midzi a. ^{II} Midɔla mi akū, minya bati dɔwa, mina ɔwɔle bɔɛɛ. Minye mi ɔɔ mitsa nɛ mi kame nɛ ɔwɔle bɔɛɛ kana kame. ^{III} Nɛ ayekī mikena ɔmɔa mɔ Hūhū a sū ni, mibɔa mbɔdi mipi ɔmɔa kakena midomɔ akū nɛ lukudɔ kame. ^{IV} Sukena mɔape mɔ Hūhū mɔape deī, ade ayea budeī kɔnete nɛ letsa mɔape a kī Baguma ve boe ɛkpa a akū a. ^V ɔlate mɔape mɔ katekado mɔape deī, ade mui kawɔla mɔape lɛmɛ deī a. ^{VI} Ade ayea budeī Baguma mɔape, batidziwa flee ɔlega kī enye letsa

nyε letsa ɔlate a. Yakena adzuma katsāmena boe flee akū, ade edeĩ nε boe flee kame a.

VII Boe kame odi nyε odi tε futetsa pŏtii fudi kī fuketimŏ kŏnyakamŏ a kī Kristo kpa a. **VIII** Nde ayekī Katselε Kpalεwa a lε kī,

“Kī ede enaa ode flee a, ekpā bati pii a kī bideĩ nε ndom kame a ebumŏ ye akū, εsē futetsa ekpa batidziwa.”

IX Finyaa, kī belε kī ede enaa ode flee a ni, foe kayŏ nyε litsa? Foe kame kpale kī enya lotŏ εka enaa tite ɔda flee a. **X** Foesū oti a kī εka enaa tite ɔda flee a, ade ye mŏape a lide enaa ode flee a, ayekī yaate katinya flee a kame.

XI Ade ye lite batidziwa futetsa, epau bati kī benya fŏto banyanε, babebā onukpē banyenε, badi letsā badenε, badi benya bate badonε akū badāmenanε mŏ fŏtsa batsanε. **XII** Ekena fukī ayekī yaalŏla Baguma bati a flee ekpa Kristo adzuma kakena, lŏkŏa bido Kristo sukena a kī senye asoli bati a kŏbē. **XIII** Foesū boe flee bŏakena ɔmŏa nε boe katekado kame, lŏkŏa bunyi Baguma Obi a lemε. Fŏafŏ bubo anε buketi mŏ Kristo, bŏna ye kutitse flee a.

XIV Lŏkŏa bolāabuki bŏnya ndε babisē kī bavālevā fŏtsa katsa vŏē fudi nyε fudi abŏa be katomena katēmena ndε ɔwe aye, ade tedake bati ake be kado nε be adzuni tŏkpa kame a.

XV Nε foe kadokŏ ni, nte bŏale ɔnŏkŏali nε ɔdŏ kame ni, kenε kī bubo anε nε osi nyε osi akū nε Kristo kī enye lŏlŏ a kame. **XVI** Ade ye pini sukena fŏtsakŏ fŏtsakŏ mŏ tisī fŏatsa mŏ akū kakena adzuma a. Foesū nte sukena kako nyε

kako akena se adzuma nde ayekĩ kefeta ni, oti moawe a abo ane kana osĩ ne ọdọ kame.

Nkpā Vọ̄ Kadzi Ne Kristo Kame.

^{XXVII} Foesũ mabi mi ne boe Ọlate dĩ akũ kĩ mitabuki midzi nkpā nde bati a kĩ binyína Baguma, kĩ be adzuni adã faa faa, ^{XXVIII} ade be lolọ kame mo fọletsa kayọkanu leme deĩ ne ọtũ kame a. Ayekĩ binyína letsama, bideĩ ato ọsĩ leme sũ ni, nkpā a kĩ bidzi a táketi mo nkpā a kĩ Baguma awe kĩ ye bati bidzi a. ^{XIX} Bibuki belá konyoã ne letsama akũ, foesũ bekọa be akũ bekpa tọkpa mo fotsa kumekume a kĩ fọado akũ efiĩ kakena.

^{XX} Midã, nné fotsa kfiĩ odu mikọle ne Kristo akũ! ^{XXI} Fonye ọnọkọali kĩ minu Yesu nkã, ade nde bati kĩ bitomena ye ni, betsa mi ọnọkọali a kĩ edeĩ ne ye kame a. ^{XXII} Foesũ mifone mi ọbla kpa kọe a kĩ midzi mitẽ a awe. Fowetsa kĩ fọake bati libula mi nkpā a kĩ midzi tọ a kade. ^{XXIII} Midani mi tọwọle mo mi adzuni kame fọkena fotsa vọ̄, ^{XXIV} mibọa ọbla vọ̄ kĩ ela nde Baguma kutidu a, kĩ yanye akũ katsa ne nkpā wĩ kĩ ekpale kame a aye. Ena ne mi akũ nde atadię aye.

^{XXV} Foesũ mifõ fovã kama! Kene kĩ odi nye odi edi ọnọkọali ekpa ye ọkọba ọte odone, kitonekĩ boe flee bonye Kristo sukena a akũ seke sisi. ^{XXVI} Nte mina kalokpa ni, mitafõ kalokpa lẹfõ mikena tọkpa, ade mitafõ kade lẹdọ ne mi kalokpa a akũ. ^{XXVII} Mitakpa Abonsam osi odima. ^{XXVIII} Oti a kĩ ekaye a efõ kaye. Ekọa awe ekena adzuma ayekĩ yaana enya ne foe kame, ete ahiãfọ leme fotsa.

^{XXIX} Mitafõ tuwuli kpa lene ne mi onukpẽ, mbom mile tuwuli wĩ kĩ taabumo bati a kĩ batse

mi ne loko a odu kame a, lokofo fovele nhila foma be. **XXX** Mitakena letsa a ki laawo Baguma Huhuh Kpalawa a kaloe, kitoneki Huhuh a Baguma koe eyi mi osu, esipi ki Baguma aate mi ne Luwi nkae a aku. **XXXI** Mifone kako kate awe, minye kalokpa mo likesi ne mi kame. Ade ayea mifo awuni mo bati bui kanye, mo adzuni kpa kakena ne bati aku a. **XXXII** Ne foe kadoko ni, mikena seme kale mina owole boee mikpa aku. Mikoa tokpa mite aku nde ayeki Baguma leme koe ete mi etsamena Kristo aku a.

V

Kene Ki Boadzi Ne Jhai a Kame.

I Ayeki minye Baguma babi ki yawe kale su ni, kene ki miaboa mbodi mina nde ye aye. **II** Kene ki odo enya mi kadzi kame aku nde ayeki Kristo we boe kale, ekoe ye aku ekpa ne boe lolo nde futetsa mo ole ki bekoa beboa bekpaa Baguma, fuwo ye ane.

III Ne ayeki minye babi ki bekpale be aku su ni, ketafeta ki adopaa, efii fotsa mo anengba lakenana ane ne mi kame malo. **IV** Ade ayea ketane ki miale okendze tuwuli, tuwuli ki taale katse, iye ki tako konyoa. Ne fukii kadoko ni, mikaanye Baguma kole. **V** Minu foe kayo ki odi nye odi ki yaboa adopaa, yado ye aku efii, mo edei anengba, kitoneki anengba keti mo bavioko kasum a, elana tsefa ne Kristo mo Baguma legakanyako a kame da.

VI Mitafoko odima lekoe tokosia tuwuli eke mi, kitoneki ade foe bame su Baguma soto kavele

aaya ne bikĩ bideĩ ato ɔsĩ a akũ a. ^{VII} Foesũ mimo bati a na odu mitakena ɔmɔa.

^{VIII} Kitonekĩ, mi mɔawe a mina ne ɔtũ kame tɔ, lɛme finyaa kĩ midani boe ɔlate bati sũ ni, mideĩ ne ɔhaĩ kame. Foesũ midzi nkpã nde bati kĩ bideĩ ne ɔhaĩ kame, ^{IX} kitonekĩ fɔtsa wĩ a kĩ nkpã kadzi ne ɔhaĩ kame ayamena nye tuwĩ kakena, kadzi ne osi kpĩ akũ mɔ ɔnɔkoali kadi. ^X Mibɔa mbɔdi mikɔle letsa a kĩ lawo boe ɔlate a anɛ. ^{XI} Mitado akũ ne fɔtsa kpa a kĩ bati akena ne ɔtũ kame a kame, mbom minye foe miwela, ^{XII} kitonekĩ fonye kɔnyɔã kĩ bale kɔdzela ne letsa a kĩ bakena ne kabela kame a akũ malo. ^{XIII} Ade nte benye fɔtsa flee biko ne ɔhaĩ kame ni, bamɔ foe kutidu kamɔ wĩ, ^{XIV} kitonekĩ letsa nye letsa kĩ benye kanya ni, liwo ne ɔhaĩ kame. Ade foesũ Katsɛle Kpalɛwa a lɛ kĩ,

“Nyinya, nɔ kĩ ɔwaa tida a,

yidza kato kanɔkpa,

lokɔa Kristo ɔhaĩ a aako ne nɔ akũ.”

^{XV} Foesũ midã kadã wĩ ne ayekĩ midzi nkpã akũ. Mitadzi nde bati kĩ binyina kadi, mbom midzi nde anyansãfɔ aye. ^{XVI} Mikena osi nye osi kĩ mina finyaa akũ adzuma kakena wĩ, kitonekĩ budeĩ ne tɔkpa kakena fuwi kame. ^{XVII} Ne foesũ mitakena mi akũ badzimbifɔ, mbom mibɔa mbɔdi kĩ mianu letsa a kĩ boe ɔlate awe kĩ mikena a kayɔ. ^{XVIII} Mitamɔa bave miwuga, kitonekĩ fɔafɔ oti akena fɔtsa kpa, mbom mifɔ Hũhũ a ɛte mi kame flee. ^{XIX} Mikɔa fɔletsa a kĩ fudeĩ ne Psalomo Ovoli, asoli tɔnɔ mɔ hũhũ kame tɔnɔ milɔmena mɔ akũ. Misã kamu tɔnɔ mɔ kawɔle tɔnɔ mikpa boe ɔlate ne mi tɔwɔle kame. ^{XX} Minye Baguma boe ɔlega kɔle daa ne

letsa nye letsa kame, ne boe ɔlate Yesu Kristo dī akū.

Batsõ Mɔ Banyɔ Bidzi Nde Bate Badone Aye.

XXI Ayekī miakɔa obu kakpa Kristo sū ni, kene kī miadolā mi akū mikpa akū.

XXII Mi batsole kī bidzi fonyɔ, midola mi akū mikpa mi banyɔ nde ayekī miadolā akū kakpa boe ɔlate a, **XXIII** kitonekī onyole nye lolɔ ekpa ɔtsõ nde ayekī Kristo leme nye asoli a lolɔ. Asoli bati a nye Kristo sukena, ade Kristo mɔawe a nye ye ɔtene a. **XXIV** Ne foesū batsole bedola be akū ne letsa nye letsa kame bekpa banyɔ, nde ayekī asoli bati a leme adola be akū kakpa Kristo a.

XXV Mi banyɔ, miwe mi batsõ kale nde ayekī Kristo we asoli bati a kale, ekɔa ye nkpā ekpa ne ye lolɔ. **XXVI** Ekena fukī yakɔa ekpale asoli bati a akū, ne kī ekɔa ye kale ekpale be akū, nde ayekī bawola oti mui a aye. **XXVII** Ewe kī asoli bati a kī yaakɔa ekpa ye a akū bekpale yededeede, bele kadā, ãye tuduli, ãye katsĩtsĩ, mɔ efĩ adima etana ne be akū.

XXVIII Ade ayea kene kī banyole bewē be batsõ kale nde ayekī bawē be mɔawe sukena kale a. Onyole kī yawē ɔtsõ kale ni, ye mɔawe akū ewē kale. **XXIX** Odima lákesĩ ye mɔawe sukena, mbom yadolā se, kadā se kadā wĩ, nde ayekī Kristo leme adāmena asoli bati a akū, **XXX** kitonekī ye sukena a akū fɔko fudi boane. **XXXI** Katsēle Kpalēwa a le kī, “Ne fukī sū onyole aafone ɔlega mɔ oma eyi ekɔa akū emena mɔ ɔtsõ, lokɔa be nviã a bekena oti mɔa.” **XXXII** ɔnokɔali a kī ebela ne Baguma kale kī kame a dzū paa. Manu foe

kayŏ kī Kristo mo asŏli bati a ɔmoa kakena bale. XXXIII Leme foatamo mi malo. Mi kame odi nye odi ewe ɔtsŏ kale nde ayekī yawe ye akū kale, ade ayea mi kame odi nye odi leme ebu ɔnyŏ a.

VI

Ayekī Bamane Mo Babi Adzi Nkpā.

^I Mi babisē, mibu mi bamane, kitonekī Kristo kame lekēnana wī foane kī miakena. ^{II} Mbla atonyade kī nfaso deī ne ye akū nye kī, “Bu aga mo ama, ^{III} ayekī no kadzi kame aale, odzi nkpā gēlēle ne tite akū.”

^{IV} Mi balega, mitakado mi babi kalokpa, mbom midoola be kadoola wī, mivele be, mikpa be kode ne boe ɔlate osi a akū.

Kene Kī Basate Mo Balate Bidzi Kadzi Wī.

^V Mi basate, mibu mi tite akū balate ne libe mo kukūtila kame. Mikena foe mo mi tɔwɔle flee nde ayekī miasum Kristo. ^{VI} Mitakena foe ane kame keke kasum, ayekī baamu mi sū, mbom nde Kristo basumune aye ni, mikena letsa a kī Baguma awe a futo mi tɔwɔle flee kame. ^{VII} Mikena mi basate tudzuma ne kawɔle kame nde boe ɔlate miasum, kī nné batidziwa miasum. ^{VIII} Mite ane kī boe ɔlate aase odi nye odi kɔto ne adzuma wī a kī ekēna a akū, nte enye ɔsate iye edzi ye akū akū.

^{IX} Mi balate leme, kene kī miakena foe lomo mikpa mi basate, lokoa mifŏ be libe kado. Mite ane kī mi atsu nviā a flee ɔlate moape mideī ne ode, kī yaadzemo odi nye odi, ade eláadā odima ane a.

Mido Hūhū Kame Kawūkanŏ Fɔtsa.

X Ke kawūna kame a, mi ɔmɔa kakena mɔ boe ɔlate ena ɔsĩ ebu, fɔtsã ye kɔbẽ kpale akū. XI Mibla kawūkanɔ fɔtsa flee a kĩ Baguma kpa mi a, ayekĩ miapuli miyidza midza ne Abonsam tedake tisi a akū. XII Kitonekĩ nné bɔmó batidziwa lamena kawū kanɔ, mbom bɔmó ablo hūhū kpa kĩ edeĩ kɔbẽ ne ɔwe kame, hūhū kĩ yanya akū, hūhū kĩ edeĩ otumi, mɔ hūhū kpa kĩ edeĩ ne ɔtū katinya kĩĩ kame lamɔ kanɔ. XIII Foesū mibla Baguma kawūkanɔ fɔtsa flee a finyaa, ayekĩ nte Luwi kpa a ya ni, miapuli midza minɔ kawū a minaawūna, mibuki mina kɔbẽ ne mi kame.

XIV Foesū mina ne kukūmanɛ kame, mikɔa ɔnɔkɔali mibɔa abɔɔ, mikɔa tuwĩ kakena misua mi ɔwɔle nde tɔwɔle libĩĩ kate sɔbɔtsaɛ aye. XV Ade mina ne kukūmanɛ kame mile lukudɔ Kale Wĩ a kĩ kenye mi kawūkanɔ tepambua kĩ miado. XVI Lokɔ nye lokɔ ni, mile katekado nde fubĩĩ kate sɔbɔtsaɛ, kitonekĩ ade foe bɔakɔa budina fubĩĩ mɔ fi a kĩ Okesĩne a atale a. XVII Mitsa Baguma nkpã kate a nde sɔbɔtsaɛ lobɔɛ aye, mile Baguma kale a nde lepame geleele kĩ Hūhū a kɔa edo ne mi awe. XVIII Mikena fukĩĩ flee ne mpaɛbɔ kame, mikaavia Baguma kabumena. Mifɔ Hūhū a ekpã mi mibɔa mpaɛ ne letsa nye letsa kame. Ne foesū ni, mina ne kukūmanɛ kame, mitafɔ akpɔ liveli mi. Mibɔa mpaɛ daa ne bati a kĩ bekpale be akū a flee lolɔ.

XIX Mibɔa mpaɛ ne yĩ malo lolɔ kĩ Baguma edo yĩ fɔletsa wĩ ne onukpẽ, ayekĩ nte maale kɔdzela ni, maapuli ndo ɔwɔle ãnye Kale Wĩ fɔletsa kolawa a ntsa bati. XX Baguma Kale Wĩ kĩĩ fɔtɔ ɔnyane manɛ sū, ade foesū nwaa kɔla malo

a. Mibɔa mpae mikpa yĩ kĩ mpuli ndo ɔwɔle nle Kale Wĩ a nde ayekĩ fɔfeta.

Paulo Kawõna Nkaɛ.

^{XXI} Tihiko, boe ɔwaẽ paa, kĩ enye boe ɔlate adzuma wĩ ɔkenane a, aaya ne awã, ebi mi yĩ akũ fɔletsã, efɔ minyi ayekĩ nlamena adzuma a. ^{XXII} Kado ndo ye ne mi sekẽ kĩ ɛyaabi mi ayekĩ boe flee bɔlamena adzuma ne awĩ, lɔkɔa edo mi kɔbẽ lemɛ.

^{XXIII} Baguma boe ɔlega mɔ boe ɔlate Yesu Kristo bekpa boe bawaẽ a flee lukudɔ, ɔɔɔ mɔ katekado. ^{XXIV} Baguma emɔ be flee a kĩ bekɔa ɔɔɔ kĩ ɛla kawũna a bawɛ boe ɔlate Yesu Kristo kale a kɔnya.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e